

## ■ COLUMNA

# Bun di bun secondhand!

CHATRINA JOSTY

**I**gl eran lungs dis da festa – cun restorants ed era butias serradas. Jau hai fatg vacanzas da Nadal en il Grischun e là, en las regiuns turisticas, èn ins en sasez disà che las butias èn avertas era la dumengia. Ma bain, consumar in pau pli pauc fa bain (a mai).

**I**nsumma, consumar pli conscientamain para dad esser trend en il mument. Jau hai collegas che cumpran mo pli vestgadira da segund maun. Betg mo ellas, mabain era bliers auters cumpran probabel pli savens en la «Berner Brocki» che en il Manor. Betg emblidar – Berna è ina citad fitg verda e sanestra. Nagliur na ves'ins quai meglier che en la brocki: La brocki è LA attracziun turistica per amis ed amias che ma visitan a Berna. Els èn mintgamai fascinads da la schelta da rauba e quant bain che la brocki è frequentada da glieud da tut gener.

**C**umprar chaussas da segund maun è in. E quai na sto betg mo esser



en la brocki u en butias da secondhand. Era sin via funcziuni – e quai perfin gratuitamain. En noss quartier na passa betg in di, ch'insatgi metta ora sin via mobiglia, cudeschs u autras chaussas cun in cedel «Gratis, zum Mitnehmen.» Ed l'interessant è, i passan savens mo paucas uras enfin che las chaussas èn davent.

**L**'onn è nov, las butias anc adina serradas, mias garnituras d'enviern dublas èn veglias – ma anc adina duvrablas – uschia che jau fatsch il pass da la cumpradra a la vendidra e quai en la butia che n'enconuscha ni firads ni temps d'avertura: l'internet. E guarda qua: Entaifer pauc

temp vend jau divers chalzers da passlung, chautschas da skis e giaccas d'enviern. Ils raps arrivann, grazia a Twint, era la dumengia immediatamain sin mes conto – ils pachets port jau spert sin posta. Tgi dovra gia zalando, sch'ins ha Chatrina? Ma las traplas da las raits digitalas socialas èn grondas. La plattafurma sur la quala jau hai vendì mias chaussas ma mussa uss trasora rauba che jau pudess cumprar!

**Q**ua ma gida segir in auter trend: Il trend dal «minimalissem». Tar quest na vai betg per esser ina minimalista e da far mo pli il minimum. Minimalissem manegia: reducir ballast e cumprar mo pli quai ch'ins dovra propi, propi. Voilà mes propiest per il 2021!

**U**che jau cumprel mo secondhand e vend da terz maun? Quai stuess funcziunar...

**\*Chatrina Josty viva cun ses partenari a Köniz en il chantun Berna. Ella lavura sco scolasta.**